

**Naaiv Buonv Sou Gu'nyuoz se Njaaux Taux
Zoux Yesu nyei Jauv**

1. Sai-gorx nyei eix-leiz.
2. Sai-gorx nyei fiem-fingx jauv.
3. Sai-gorx nyei gong
4. Maaiah hnyouv zoux sai-gorx nyei mienh
5. Zoux Yesu nyei sai-gorx
6. Yesu heuc mbuo daaih zoux Ninh nyei sai-gorx
7. Yesu Jaa'Ndaangc Mbenc Ziangx bun mbuo zoux nyei gong
8. Yesu zoux nyungc zeiv bun mbuo zuotc
9. Ziouv Yesu heuc mbuo daaih muangx Ninh nyei waac fu'sux ninh
10. Heuc daaih fu'sux
11. Oix zuqc simv 2 nyungc seix hnyouv nyei sic.
12. Maiv dungx hnamv ganh nyei nza'hmien camv jiex ndaangc.
13. Maaiah hnyouv dorh mienh zoux sai-gorx nyei jiu baang
14. Dorh mienh zoux sai-gorx nyei mienh (zoux bieiv)
15. Yesu paaiv nqa'haav laai nyei waac.

1. Sai-Gorx Nyei Eix Leiz

- a. Sai-gorx, Se hngangv yietc dauh mienh mingh zuotc nyungc, fai zuotc waac, fai kauv hoqc yiem ganh dauh mienh daaih. Yiem Siang-Ngaengc waac mbuo buatec Yesu heuc duqv 12 dauh mienh daaih zoux ninh nyei sai-gorx. Ziouv Yesu njaaux wuov deix 12 dauh mienh daaih tengx Ninh zoux gong. Wuov deix 12 dauh mienh duqv hoqc ziangx nyei ziangh hoc ziouc duqv mbuox heuc ziepc 12 dauh Gong-Zoh.
(Matv^taai. 10:1-15; Maa^ko 3:13-19; Lugaa 6:12-16).
- b. Mbuo dauh dauh sienx Yesu nyei mienh se benx Yesu nyei "horqc saeng" fai "sai-gorx." Mbuo hoqc nyei sou se "Ging-Sou." Mbuo nyei domh fin-saeng se Ziouv Yesu. Mbuo nyei kauv hoqc jauv se oix hoqc hiuv taux hngangv haaix nor haih zoux duqv horpc Tin-Hungh nyei hnyouv. Hngangv haiv nor haih mengh baeqc Tin-Hungh nyei za'eix.

2. Sai-Gorx Nyei Fiem-Fingx:

1. Mbuo hoqc nitv fatv Tin-Hungh. (1 Ti^mo^tai 4:7)
2. Oix zuqc maaiah hnyouv yaac jorm hnyouv fuh sux Tin-Hungh.(Lomaa 12:11, E^fe^so 6:7)
3. Maaiah hnyouv nyiemc Yesu zoux Ziouv nyei mienh.
4. Maaiah hnyouv nyiemc ganh zoux faix caux maaiah zoux bou nyei hnyouv.
5. Maaiah hnyouv ngorc taux Tin-Hungh nyei waac nyei mienh.

3. Zoux Sai-Gorx Nyei Gong:

- a. Zunh Tin-Hungh nyei kuv fiensex.
- b. Njaaux Ging-Sou, njaaux leiz-baaix horqc
- b. Njaaux mienh muangx Tin-Hungh nyei waac, kuinx mienh nitv Tin-Hungh
- d. Tengx mienh daaux gaux zorc baengc.
- e. Lorz mienh daaih zoux sai-gorx.

4. Maaiah Hnyouv Zoux Sai-Gorx Nyei Mienh:

- a. Nyunc guangc baamh gen nyei jauv.
- b. Nyunc fungx ganh nyei maengc bun Yesu longc zoux Ninh nyei gong.
- c. Nyunc muangx Yesu nyei waac yaac ei jienv zoux.
(Yo^han 8:31)
- d. Nyunc diev kouv weic Yesu.
- e. Nyunc hoqc hiuv taux Yesu nyei jauv.
- f. Mbuo oix zuqc paaiv gong bun mienh zoux.
- g. Maaiah hnyouv oix tengx mienh nyei mienh.
- h. Mv nzaeng bieiv zoux nyei mienh.
- i. Maaiah hnyouv gaaax taux Tin-Hungh nyei gong nyei mienh.
- j. Maaiah hnyouv oix buatec jiu baang hlo faaux nyei mienh
- k. Yesu gorngv, "**Zien yie nyei sai-gorx** se dongh ei jienv yie njaaux nyei waac zoux wuov deix mienh (Yo^han 8:31; Matv^taai 7:21-27).

5. ZOUX YESU NYEI SAI-GORX

(Matv^taai 4:18-22, Lugaa 9:23)

- a. Mbuo ganh (yie ganh)oix zuqc hiuv duqv ganh maaih zuiz, yaac nyiemc mbuo nyei zuiz. (Bide nyei waac - Lu^gaa 5:8)
- b. Dorn faix hiuv duqv yaac nyiemc ninh maaih zuiz (Lugaa 15: 13-24)
- c. Mbuo hiuv dingc (sienx dingc) Ziouv Yesu ziangh jienv yaac sienx Ninh zoux mbuo nyei Njoux Ziouv yaac zoux maanc muotc nyei Hung. (Nyungc zeiv: Yo^han 4:42, Naa^taa^naa^en nyei waac Yo^han 1:49)
- d. Zoux Yesu nyei sai-gorx se oix zuqc funx Yesu benx da'yietv yiem mbuo nyei maengc (Lugaa 14:25-26)
- e. Zoux Yesu nyei sai-gorx se oix zuqc maaih noic haih diev duqv kouv naanc nyei jauv (Lugaa 14:27)
- f. Zoux Yesu nyei sai-gorx se oix zuqc liuc leiz mbenc ganh nyei maengc ndaangc. (Lugaa 14:28-32)
- g. Zoux Yesu nyei sai-gorx se oix haih siev duqv guangc baamh gen nyei nyungc- nyungc jauv. (Lugaa14:33)
- h. Ngorc oix hiuv Tin-Hung nyei Waac.
- i. Mv ceng ganh gorngv, mbuo hiuv nyei mv zuqc hoqc.
- j. Haih zipv mienh njaaux fai kuinx nyei mienh.
- k. Nyunc muangx Yesu njaaux yaac nyunc ziev gan Yesu .
- l. Nyunc ziev siev maengc weic Yesu. (Lugaa 9:23)
- m. Ninh mbuo nyunc guangc ganh nyei gong mingh gan Yesu. (Matv^taai 4:20,22)
- n. Ninh mbuo nyunc muangx Yesu njaaux ninh mbuo.
- p. Ninh mbuo nyunc bun Yesu longc ninh mbuo zoux Ninh nyei gong.
- q. Maaih noic haih diev duqv kouv naanc.
- r. Maaih hnyouv siev ganh nyei maengc weic Ziouv Yesu (Lugaa 9:57-62)
- s. Oix zuqc maaih ziepc zuoqv hnyouv sienx kaux Yesu, bangc Yesu
- t. Oix zuqc hiuv duqv mbuo sienx nyei jauv, sienx nyei gorn-baengx yiem haaix daaih
- u. Maiv zeiz maaih mbungh mbienv hnyouv nyei mienh.

- v. Jorm hnyouv oix duqv Singx Lingh nyei zingh nyeic (1 Ko^lin^to 14:12a)
- w. Jorm hnyouv ceix jiu baang (1 Ko^lin^to 14:12b)
- x. Maiv zeiz jorm hnyouv gunv jiu baang (1 Bide 5:3)
- y. Nyunc muangx Yesu paaiv gong bun ninh mbuo. (Matv^taai 10:1-15)
- z. Nyunc zoux, yunc diev kouv weic Yesu nyei gong.

6. Yesu Heuc Mbuo Daaih Zoux Ninh Nyei sai-gorx

- a. Ziouv Yesu heuc mbuo daaih gan Ninh zoux Ninh nyei sai-gorx maaih ziangh hoc mbuo zuqc diev kouv. Maaih deix zuqc heuc daaih yaac zuqc daic weic ninh mbuo nyei sienx fim. Mv baac dauh dauh Giduc mienh Tin-Hung heuc daaih fungx nzengc maengc, maiv gunv zuqc guangc ziox nyungc yaac laengz fuh sux Ninh. (Lomaa 12:1 ; Maako 10:28-30).
- b. Ziouv Yesu mv zeiz kungx heuc Ninh nyei sai-gorx daaih muangx nzengc Ninh nyei waac hngv, mv baac liemh juangc maengc ziangh (Yo^han 15:4-5).
- c. Yesu yaac mbuox zaqc ninh mbuo gorngv, haiv dauh gan longx Yesu zungv zuqc mienh zoux doqc, zuqc buangh kouv naanc (Yo^han 15:20).
- d. Mbuo dauh dauh yaac oix zuqc jangx jienv, maiv zeiz mbuo ginv Ziouv Yesu, mv baac Ziouv Yesu ginv mbuo daaih fuh sux ninh zoux ninh nyei gong dongh

7. Yesu jaa-ndaangc mbenc ziangx bun mbuo zoux nyei gong. (Yo^han 15:16; E^fe^so 2:10)

- a. Mbuo dauh dauh hnaamv taux mbuo nyei nza'hmien gorngv, "Ov, yie se Ziouv Yesu ginv yie daaih fuh sux Ninh." Se gorngv mbuo hngv naaiv nor sienx, hngv naaiv buatc nor, mbuo nyei eix yaac ganh nyungc, ziouc jorm hnyouv yaac maaih qaqv fuh sux Ninh.

Mbuo yaac oix zuqc faix fim maiv dungx ei mbuo ganh nyei hnyouv, fai mbuo ganh nyei eix, mv baac oix zuqc ei Tin-Hungh nyei eix, weic zuqc Tin-Hungh nyei eix se longx, horpc, dunh yunh nyei za'eix. (Lo^maa 12:2)

b. Yietc diuh jienv haic nyei lingc mbuo oix zuqc hietv yiem mbuo nyei hnyouv se dongh Ziouv Yesu PAAIV bun mbuo, yie caux meih, naaiv diuh siangh lingc aqv. (Yo^han 13:34-35) Ziouv Yesu gorngv mbuox Ninh nyei ziepc yietv dauh sai-gorx, "Meih mbuo oix zuqc laanh hnamv laanh, hngangv yie hnamv meih mbuo nor. Se gorngv meih mbuo hngangv naaiv zoux nor, mienh ziouc hiuv duqv meih mbuo zoux Yie nyei sai-gorx."

c. Zoux Ziouv Yesu nyei sai-gorx maiv zeiz hungh heic. Maaih ziangh hoc oix zuqc diev mun, wuom mueic cuotv. Mv baac oix zuqc jangx jienv, mv zeiz mbuo ganh ndaam naaiv deix ga'naaiv buix hngangv, Singx Lingh yaac oix tengx jienv mbuo ndaam yaac aengx maaih juangc fuh sux Giduc nyei gorx-youz, dorc ziex. Se gorngv mbuo longc nzengc hnyouv ei jienv Ziouv Yesu paaiv bun mbuo nyei SIANG-LINGC zoux. Mbuo laanh hnamv laanh, laanh tengx laanh nor mbuo ziouc maaih qaqv zoux ziangx Ninh paaiv bun mbuo zoux nyei gong.

8. Yesu Zoux Nyungc-Zeiv Bun Mbuo Zuotc

Ziouv Yesu heuc dauh dauh sai-gorx daaih, Ninh yaac koi Ninh nyei hnyouv, Ninh nyei maengc, yaac taan bun ninh mbuo. Mienh buate Ziouv Yesu nyei hnyouv yaac buate Ninh nyei zien hnamv (maiv zeiz gorngv waac gaam hngangv, liemh zoux cuotv nyei sic), mienh ziouc oix daaih lorz Ninh aqv.

Ziouv Yesu hnamv haic Ninh nyei sai-gorx mbuo, ninh mbuo yaac hnamv haic Ziouv Yesu, hngangv naaiv dongh Yesu zuqc ding yiem ziepc nzaangc jaax nyei ziangh hoc, ziouc bun Ninh nyei sai-gorx mbuo nyei hnyouv mun, hnyouv nzauh haic, mv

maaih lamh hnamv dornx. Ninh mbuo nyei sienx fim zungv ndortv. Mv baac Yesu daic aengx nangh daaih nyei ziangh hoc Ninh longc suonc hnyouv, horh norh nyei dorh ninh mbuo, kuinx ninh mbuo nyei hnyouv aengx longx hngangv loz wuov nor. Sai-gorx mbuo ziouc aengx bungx hnyouv Ziouv Yesu yaac sienx gauh longx mingh wuov douc.

Bide nzauh nyei weic zuqc ninh mv nyiemc Yesu buo nzunc. Mv baac Yesu maiv hemx, mv qiex jiez, mv nzornz Bide, dauh nzuonx Ninh kuinx Bide, bun Bide hiuv dingc Yesu corc hnamv ninh yaac guangc ninh nyei zuiz.

(Maa^ko 16:7 tin-cai gorngv mv baac Yesu nyei waac)

Naaiv longx haic nyei nyungc zeiv bun mbuo zoux Yesu nyei bou nyei mienh zuotc. Yie caux meih se dongh oix zuqc zuotc nyei mienh. Se gorngv mbuo zoux mun haiv dauh nyei hnyouv fai bun haiv dauh nzauh fai mienh zoux bun meih yaac zeiz, mbuo ziouc horpc zuqc suonc hnyouv nyei mingh kuinx ninh yaac bun ninh hiuv dingc mbuo guangc ninh nyei zuiz yaac aengx hnamv ninh hngangv loz wuov nor.

9. Ziouv Yesu Heuc Mbuo Daaih Muangx Ninh nyei Waac Fuh Sux Ninh

Zoux Yiu-tai fin-saeng nyei sai-gorx wuov deix oix muangx ninh mbuo nyei fin-saeng nyei waac hngangv nouh gauv muangx waac wuov nor. Ninh mbuo zuov taux ninh mbuo hoqc baac sou ninh mbuo ganh ziouc duqv zoux fin-saeng aqv. Mv baac Yesu ginv ninh nyei sai-gorx daaih mv zeiz hngangv naaic. Yesu heuc Ninh mbuo daaih yietc seix zoux bou muangx nzengc Ninh nyei waac. Yiem lungh ndiev nyei ziangh hoc mbuo yietc liuz hoqc maiv ziangx, maiv haih baac.

Muangx Tin-Hungh nyei waac, ei Tin-Hungh nyei za'eix se bun mbuo nyei maengc duqv buangv eix. "Maaih mienh camv nyei heuc jienv, 'Ziouv aac, Ziouv aac, mv baac kungx dongh ei Tin-Hungh nyei eix wuov deix duqv bieqc Tin-Hungh nyei guoqv hngangv. (Matv^taai 7:21) Hngangv naaiv bun mbuo hiuv duqv gorngv ei Tin-Hungh nyei eix za'gengh jienv haic.

Zoux Ziouv Yesu nyei bou fuh sux Ninh nyei eix leiz: se gan jienv Ziouv Yesu mingh, mingh dongh Ninh mingh nyei jauv, yaac zipv dongh Ninh mbenc ziangx bun mbuo nyei gong. Eix leiz se guangc mbuo maaih zuiz nyei loz- maengc, zipv siang nyei maengc dongh Ziouv Yesu bun daaih nyei siang-maengc.

Mbuo nyei hnyouv sienx, mbuo nyei beih yaac oix zuqc zoux gan jienv mingh. Mbuo ih jaax nyei jiu-bang za'gengh oix zuqc horpc nzengc Tin-Hungh nyei eix wuov nyunge mienh. Maaih dauh finh saeng gorngv," Maaih mienh camv nyei sienx mv baac za'gengh ei jienv zoux nyei mienh se maaih zoqc haic."

10. Heuc Daaih Fuh Sux (Matv^taai 10:7-8, E^fe^so 2:10, Lo^maa 12:11, 2 Ti^mo^tai 4:2).

Ziouv Yesu heuc mbuo daaih gan Ninh zoux Ninh nyei gong mv baac mv daan naaiv hngangv, Ninh aengx heuc mbuo mingh zunh kuv fienx, zorc baengc, bun mienh nangh daaih.

Ei orv sin se m'nziex mbuo mv haih zorc mv duqv nyungc-nyungc baengc, mv baac mbuo haih zorc lingh wuonh nyei baengc, kuv ndie se Tin-Hungh nyei waac(goiv maengc, nzauh tiuv benx njienh youh). M'nziex daic mingh nyei mienh mbuo heuc mv nangh, mv baac haih zunh kuv fienx bun mv duqv njoux nyei lingh wuonh haih nangh daaih.

11. Oix Zuqc Simv 2 Nyungc Seix Hnyouv nyei Sic

a. Oix zuqc simv jienv maiv dungx nzaeng zoux hlo. Se gorngv mbuo kungx hnamv nzaeng zoux hlo hngangv nor, Tin-Hungh maiv zorc mbuo nyei maengc, yaac aqc duqv ceix en bun mbuo. Ziouv Yesu nyei 12 dauh gong-zoh mbuo mv gaengh zipv Singx Lingh nyei ziangh hoc, ninh mbuo nzaeng zoux hlo. (Matv^taai 18:1; 20:24; Proverbs 16:18) Mv baac zipv liuz Singx Lingh mv maaih naaiv nyungc eix aqv.

Ging-sou gorngv mbuox mbuo, "Yiem Tin-Hungh nyei nza'hmien nyiemc ganh zoux faix, horpc nyei ziangh hoc taux Tin-Hungh oix bouh mbuo faaux, (Matv^taai 18:4).

12. Maiv dungx hnamv ganh nyei nza'hmien

camv jiex ndaangc.(Matv^taai 10:39; 1 Bide 5:6).

Maiv zeiz guangc, maiv goux hmuangv doic caux jaah dingh. Mbuo nyei maengc gauh jienv jiex se Tin-Hungh mv zeiz yie ganh. Nyungc zeiv: Se gorngv meih hnamv ganh nyei nza'hmien gauh camv jiex nor, meih maiv guangc zieux nyungc nyei daaih bieqc wuic aqv. (Zeiz nyei fai?) Se gorngv yie hnamv taux guangc ndaamh hlaax gong daaih hoqc Ging-Sou, se gorngv yiem biau nor zungv zoux duqv gong camv fai jangv haic aqv....

*Douh mbuo ganh duqv longx.

*Douh ganh duqv kuh yiem.

*Douh ganh duqv nyaanh camv.

Dongh mbuo zoux weic Ziouv Yesu nyei gong yiem mbuo naaiv lungndiev mbuo mv maaih yietc nyungc haih ndortv buonv. 1 Ko^lin^to 15:58. Mv baac duqv leic zinh camv haic. Maa^ko 10:28-30

Se gorngv mienh heuc mbuo tengx zoux Tin-Hungh nyei gong, gunv zoux aqv. Maaih deix mienh mv heuc, mv baac mbuo buate horpc tengx, horpc zoux gunv zoux aqv. Se gorngv mv haih zoux, mbuo yaac haih hoqc nyei. Maaih deix mienh gorngv, "Yie mv maaih gong-mengh yie mv oix zoux fai mv zuqc zoux." Naaiv yaac maiv horpc.

Ziouv Yesu ginv 12 dauh sai-gorx; cuotv liuz Yu^ndaa, mv maaih yietc dauh ngaengc mv gan Ninh.

13. Maaih hnyouv dorh mienh zoux sai-gorx nyei jiu baang

- a. Jiu baang oix zuqc maaih hoqc Ging-Sou nyei fiuh guaanh.
- b. Dorh Jiu baang nyei mienh gox oix zuqc dongh hnyouv juangc jienv ceix jiu bang.
- c. Zoux bieiv nyei mienh oix zuqc njaaux jiu bang bieqc hnyouv taux Tin-Hungh nyei gong.
- d. Zoux bieiv nyei mienh oix zuqc lorz javv njaaux jiu bang hiuv taux Tin-Hungh nyei javv.
- e. Se gorngv haiv norm jiu bang oix maaih mienh tengx nzipc gong, oix zuqc njiec buonv ceix caux orn hnyouv bun mienh lunx mienh. Bun ninh mbuo maaih buonv tengx zoux.
- f. Jiu baang haih henv se oix zuqc maaih mienh njaaux Ging-Sou nyei javv bun jiu bang.
- g. Jiu baang oix henv oix zuqc siev duqv njiec buonv-zinh ceix mienh lunx mienh faaux.
- h. Jiu baang oix henv oix zuqc maaih mienh maaih hnyouv hoqc Ging-Sou.

14. Dorh Mienh Zoux Sai-Gorx Nyei Mienh (Zoux Bieiv)

- a. Ninh ganh oix zuqc maaih hnyouv oix tengx mienh hiuv taux Tin-Hungh nyei javv.
- b. Ninh ganh oix zuqc hiuv dingc ninh sienx nyei javv se dongh haaix nyungc, haaix dauh.
- d. Ninh ganh oix zuqc ziepc zuoqv hnyouv yiem ninh njaaux nyei javv.
- e. Ninh njaaux nyei javv, ninh ganh yaac oix zuqc hiuv duqv nyei, haih ei jienv zoux nyei.
- f. Ninh ganh oix zuqc zoux nyungc zeiv bun muangx ninh njaaux nyei mienh.
- g. Ninh oix zuqc maaih suonv hnyouv, yaac oix zuqc maaih noic.
- h. Ninh maiv dungx maaih ceng-hlo nyei hnyouv. (Pro 13:10, 16:18)
- i. Ninh maiv dungx nzauh heix mienh nzaeng ninh nyei gong zoux.
- j. Ninh oix zuqc njaaux zien Ging-Sou nyei waac.
- k. Ninh oix zuqc maaih ziepc zuoqv hnyouv bun Tin-Hungh caux muangx ninh nyei mienh.
- l. Ninh oix zuqc maeng baeqc ninh maiv zeiz njaaux longc mengh dauh.
- m. Oix zuqc zoux nyungc zeiv bun meih njaaux nyei mienh (1 Ti^{mo}^tai 4:11-16).
- n. Oix zuqc maaih hnyouv tengx mienh hiuv taux Tin-Hungh nyei javv nyei mienh.
- o. Oix zuqc mingh yuoqc mienh daaih.

- p. Oix zuqc mbenc njaaux bun mienh dongh mienh qiex zuqc nyei javv.
- q. Oix zuqc taan jiu baang qiex zuqc nyei javv bun mienh hiuv.
- r. Oix zuqc kuinx mienh caux jienv mbuo zoux Tin-Hungh nyei gong.
- s. Oix zuqc ginx mienh daaih tengx zoux Tin-Hungh nyei gong (Gong-Zoh 6:1-7).
- t. Oix zuqc paaiv gong bun mienh zoux.
- u. Njaaux nyei mienh oix zuqc zoux nyungc zeiv bun hoqc nyei mienh zuotc.
- w. Njaaux nyei mienh oix zuqc ziangh yiem mbuo njaaux nyei javv.
- x. Njaaux nyei mienh oix zuqc souv dingc yiem mbuo njaaux nyei javv.
- y. Njaaux nyei mienh oix zuqc zoux ei mbuo njaaux nyei javv.

15 . Yesu Paaiv Nqa'haav-Laai Nyei waac

(Matv^{taai} 28:16-20)

- a. Oix zuqc mingh njaaux maanc fingx mienh zoux Yie nyei sai-gorx.
- b. Oix zuqc dengv Die, Dorn caux Singx Lingh nyei mbuox tengx ninh mbuo jiex wuom nyei leiz.
- c. Oix zuqc njaaux ninh mbuo ei nzengc yie mbuox meih mbuo nyei nyungc-nyungc.
- e. Yesu jiu gong bun sai-gorx mbuo ganh zoux mingh aqv (Gong-Zoh 1:8).

Χινη μααν
 χ μαιω δυν
 γξ γυανγχ ζ
 ουξ Ψεσυ ν
 ψει σαι-γο
 ρξ

